



Maximinus patre Mecca Gotho, et matre Abaha ex Alanis genitus fuit, quæ quidem gentes non immeritò Germanis semper annueratę fuerunt. Erat hic ultra communem hominum mensuram (ut Cordus scribit) octo pedum longitudine: præterea tanta corporis fortitudine præditus, ut alij eum Crotoniatem Milonem, alij Herculem, alij Achillem, alij Aiace[m] uocarunt. hic à pueritia opilio fuit, & apud suos pecora pavit. postea uerò amicorum consilio castra sequi statuit, itaque prima stipendia sub Seuero Imperatore fecit, atq[ue] inter stipendatores corporis sui in aula locatus, & muneribus donatus, quod magnitudine corporis cõ-

spicius, & inter milites sua uirtute clarus esset. Id autem sic euenit: Cum Seuerus ludos militares in natali filij festo celebraret, atque Maximinus proposita præmia cerneret, principem Barbara lingua rogauit, ut sibi quoq[ue] cum militibus decertare liceret. Tum Seuerus corporis proceritatem miratus, ne quid indignum militibus homo agrestis inferret, cum lixis luctari concessit. Horum sedecim, nulla temporis intercapedine data, mira prosperitate strauit, & præmijs acceptis stipendia equestria meruit. Verum tertio die post, cum Cæsar eius uires clarius cognoscere uellet, Maximino præcurrente, equum suum in gyrum uarijs anfractibus inflexit, ac Gothum fatigare statuit. Postea princeps quæsiuit, an nunc luctam inire uellet? Cui assentiēti, Seuerus septem ualidissimos milites elegit, quibus cum luctaretur. sed cum illos nullo labore prosterneret, & terræ allideret, inter sui corporis stipendatores eum elegit, & multis donis locupletauit. Seuero autē defuncto sub Antonino Caracalla militares ordines duxit, atq[ue] magnum sibi nomen comparauit. Cum post Macrinus ad Imperium uenisset, ipse in patriam redijt, aliquot sibi possessiones impetrauit, & cum Gothis ac Alanis per triennium familiarissimè uixit, plurimum ab ijs amatus.